

Na osnovu člana 16. stav 4. Zakona o Vladi Zeničko-dobojskog kantona - Prečišćeni tekst (“Službene novine Zeničko-dobojskog kantona”, broj: 7/10 i 3/23), te Strategije razvoja Zeničko-dobojskog kantona za period 2021.-2027. godina („Službene novine Zeničko-dobojskog kantona“ broj: 3/21) i Akcionog plana za implementaciju Strategije razvoja Zeničko-dobojskog kantona za period 2026.-2028. godina, na prijedlog Ministarstva za rad, socijalnu politiku i izbjeglice, Vlada Zeničko-dobojskog kantona, na 131. sjednici, održanoj 05.06.2026. godine, d o n o s i

## ZAKLJUČAK

### I.

Daje se saglasnost na prijedlog „Programa sufinansiranja zapošljavanja pripravnika VSS i SSS u 2026. godini“, Ministarstva za rad, socijalnu politiku i izbjeglice i JU Službe za zapošljavanje Zeničko-dobojskog kantona.

### II.

Ovlašćuje se ministar Ministarstva za rad, socijalnu politiku i izbjeglice da u ime Vlade Zeničko-dobojskog kantona potpiše Program iz tačke I. ovog zaključka.

### III.

Međusobna prava i obaveze strana potpisnica Programa i poslodavaca - korisnika Programa, detaljno će biti uređena Ugovorom o sufinansiranju, koji će potpisati ministar Ministarstva za rad, socijalnu politiku i izbjeglice, direktor JU Služba za zapošljavanje kao implementator Programa i poslodavci kao korisnici Programa.

### IV.

Vlada Zeničko-dobojskog kantona će po davanju saglasnosti na Program, donijeti posebnu odluku o odobravanju sredstava za sufinansiranje istog, nakon čega će sredstva biti doznačena JU Služba za zapošljavanje Zeničko-dobojskog kantona za realizaciju Programa.

### V.

Za realizaciju Programa zadužuju se Ministarstvo za rad, socijalnu politiku i izbjeglice i JU Služba za zapošljavanje Zeničko-dobojskog kantona, svako u okviru svoje nadležnosti.

### VI.

Zaključak stupa na snagu danom donošenja.

Broj: 02-\_\_\_\_\_/26  
Datum, 05.06.2026. godine  
Zenica

**PREMIJER**

*Nezir Pivić*

DOSTAVLJENO:

1x Ministarstvo za rad, socijalnu politiku i izbjeglice,  
1x JU Služba za zapošljavanje Zeničko-dobojskog kantona,  
putem Ministarstva,  
1x a/a.

*Prijedlog*

**PROGRAM  
SUFINANSIRANJA ZAPOŠLJAVANJA PRIPRAVNIKA  
VSS I SSS U 2026. GODINI**

Maj, 2026. godine

## **1. Osnov za donošenje, izvor finansiranja i nosioci realizacije Programa**

U skladu sa Strategijom razvoja Zeničko-dobojskog kantona za period 2021.-2027. godina, Akcionim planom za implementaciju Strategije razvoja Zeničko-dobojskog kantona za period 2026.-2028. godina i Godišnjim planom rada Ministarstva za rad, socijalnu politiku i izbjeglice Zeničko-dobojskog kantona za 2026. godinu, Ministarstvo za rad, socijalnu politiku i izbjeglice (u daljem tekstu: Ministarstvo) i JU Služba za zapošljavanje Zeničko-dobojskog kantona (u daljem tekstu: Komora) sačinili su „Program sufinansiranja zapošljavanja pripravnika VSS i SSS u 2026. godini“ (u daljem tekstu: Program).

Za realizaciju Programa predviđena su sredstva u iznosu od 800.000,00 KM, u skladu sa Programom utroška sredstava planiranih Budžetom Zeničko-dobojskog kantona za 2026. godinu, u razdjelu 20, Ministarstvo za rad, socijalnu politiku i izbjeglice, izvor 10 i izvor 40, Budžeta Zeničko-dobojskog kantona za 2026. godinu broj: 02-11-3006/26 od 18.02.2026. godine i broj: 02-11-4369/26 od 06.03.2026. godine.

## **2. Cilj Programa**

Program se realizira s ciljem zapošljavanja najmanje 90 osoba sa evidencije nezaposlenih u Zeničko-dobojskom kantonu sa posebnom socijalnom i rodnom osjetljivošću, radi njihovog zapošljavanja, sprječavanja dugotrajne nezaposlenosti, unaprjeđenja radnih sposobnosti, te stvaranja uvjeta za jačanje konkurentnosti mladih osoba bez radnog iskustva kroz osposobljavanje za rad u struci i stjecanje prvog radnog iskustva.

## **3. Ciljna grupa**

Programom će se sufinansirati zapošljavanje sljedećih kategorija nezaposlenih osoba:

- Mladi bez radnog iskustva – pripravnici visoke stručne spreme – 50 nezaposlenih
- Mladi bez radnog iskustva – pripravnici srednje stručne spreme – 40 nezaposlenih

Ciljna grupa su osobe do 35 godina starosti, prijavljene na evidenciju nezaposlenih na području Zeničko-dobojskog kantona najmanje dan prije objave Javnog poziva.

Poslodavcu se neće sufinansirati zapošljavanje osoba, tj. neće se zaključiti ili će se raskinuti ugovor o sufinansiranju zapošljavanja u slučaju za koji Služba utvrdi namjeru zloupotrebe ciljeva i drugih odredbi ovog programa.

U ovoj mjeri ne mogu sudjelovati osobe koje su stekle radno iskustvo u potrebnom ili kraćem vremenskom periodu u struci/zvanju za koje su se školovale.

## **4. Korisnici Programa**

Korisnici Programa su poslodavci registrovani u Zeničko-dobojskom kantonu koji redovno izmiruju obaveze po osnovu poreza i doprinosa, te oni koji imaju potpisan sporazum sa Poreznom upravom Federacije BiH o izmirenju duga po osnovu doprinosa, kao i oni na koje se odnosi Zakon o finansijskoj konsolidaciji.

U Programu ne mogu učestvovati:

- poslodavci koji su koristili kreditna sredstva iz poticajnih mjera Federalnog zavoda za zapošljavanje i JU Službe za zapošljavanje ZDK, a nisu ispoštovali obaveze u skladu sa zaključenim ugovorima i ne pravdaju redovno ugovorena sredstva,
- poslodavci koji ne izmiruju redovno obaveze po osnovu poreza i doprinosa ili koji nemaju potpisan sporazum sa Poreznom upravom FBiH o izmirenju duga po osnovu poreza i doprinosa.

Maksimalan broj osoba za koje jedan poslodavac može aplicirati je dva (2).

## **5. Način i iznos sufinansiranja**

Ministarstvo će pripremiti prijedlog odluke o odobravanju sredstava za sufinansiranje Programa, koja će po donošenju predmetne odluke Vlade Zeničko-dobojskog kantona biti transferisana u punom iznosu na račun JU Službe za zapošljavanje Zeničko-dobojskog kantona, kao namjenska sredstva za realizaciju Programa u 2026. i 2027. godini.

Programom je predviđeno sufinansiranje troškova doprinosa, a u slučaju da je iznos sufinansiranja veći od troškova doprinosa, ostatak iznosa sufinansiranja se koristi za isplatu dijela neto plate. Služba korisniku, po dostavljenom pravdanju, refundira sredstva.

Programom su predviđene sljedeće mjere:

- za osobe sa srednjom stručnom spremom (III i IV stepen), prijavljene na evidenciju nezaposlenih JU Služba za zapošljavanje Zeničko-dobojskog kantona prije dana objave Javnog poziva, uz zasnivanje radnog odnosa na period od šest (6) mjeseci,
- za osobe visokom stručnom spremom (VII stepen), odnosno sa završenim prvim ciklusom po Bolonjskom sistemu studiranja (180/240 ECTS) i drugim ciklusom (300 ECTS), ukoliko su prijavljene na evidenciju nezaposlenih JU Služba za zapošljavanje Zeničko-dobojskog kantona prije dana objave Javnog poziva, uz zasnivanje radnog odnosa na period od 12 mjeseci.

Cilj ove mjere je da se što većem broju mladih osoba dobi do 35 godina omogući osposobljavanje za rad u struci i sticanje prvog radnog iskustva u zvanju za koje su se školovale, kroz zasnivanje radnog odnosa, te na taj način poboljša njihova konkurentnost i integracija na tržištu rada.

U ovoj mjeri ne mogu sudjelovati osobe koje su stekle radno iskustvo u potrebnom ili kraćem vremenskom periodu u struci/zvanju za koje su se školovale.

U ovoj mjeri mogu sudjelovati samo osobe koje na dan objave javnog poziva nemaju navršenih 30 godina života.

### **Mjesečni iznos sufinansiranja:**

- 950 KM u trajanju od šest (6) mjeseci za osobe sa srednjom stručnom spremom (III i IV stupanj), prijavljene na evidenciju nezaposlenih prije dana objave Javnog poziva,
- 950 KM u trajanju od 12 mjeseci za osobe sa visokom stručnom spremom (VII), odnosno sa završenim prvim ciklusom po Bolonjskom procesu (180/240 ECTS) i drugim ciklusom (300 ECTS), prijavljene na evidenciju nezaposlenih prije dana objave Javnog poziva.

-

## **6. Priprema za realizaciju Programa**

U okviru pripremne faze Programa, Služba:

- sa Ministarstvom potpisuje Program sufinansiranja zapošljavanja pripravnika VSS i SSS u 2026. godini, nakon što Vlada Zeničko-dobojskog kantona da saglasnost na isti,
- informiše javnost o Programu najkasnije osam (8) dana prije objave Javnog poziva putem web portala Službe, te putem web portala Vlade ZDK,
- izrađuje obrasce potrebne za realizaciju Programa.

## **7. Prijava na Program**

Prijave za učešće na navedeni Program vrše se dostavljanjem dokumentacije na protokole biroa rada prema sjedištu djelatnosti poslodavaca. Poslodavci su u obavezi dostaviti sljedeću dokumentaciju:

- Obrazac prijave
- Uvjerenje Porezne uprave Federacije BiH o izmirenim porezima i doprinosima ne starije od mjesec dana od dana podnošenja prijave za sufinansiranje/Obrazac prijave Program sufinansiranja zapošljavanja Posao za sve 2025/2026 ili Sporazum s Poreznom upravom Federacije BiH o izmirenju duga po osnovu poreza i doprinosa
- Dokaz o glavnom računu (karton deponovanih potpisa, ugovor o tekućem računu sa bankom, ili potvrda o računu)

Prijave na mjeru se evidentiraju u realnom vremenu, po datumu i vremenu zaprimanja.

Sve prijave će, u skladu sa pravilima Programa, biti provjerene.

Specifične kriterije Programa utvrđuje Služba.

Služba će na svojoj web stranici postaviti informaciju o prispjelim prijavama poslodavaca sa statusom „odobrene“ i „na čekanju“. Poslodavac može, na vlastitu odgovornost, zaposliti osobu iz ciljne grupe odmah nakon prijave na Javni poziv s tim što će se ugovor o sufinansiranju zapošljavanja zaključiti samo sa poslodavcima koji ispunjavaju uslove Programa, u okviru raspoloživih sredstava ili nakon što ga Služba obavijesti da mu je poticaj odobren, a najkasnije u roku od 15 dana od dana odobravanja poticaja.

## **8. Zaključivanje ugovora o sufinansiranju**

Poslodavac kojem se poticaj odobri, sa ciljem zaključivanja ugovora, dužan je Službi dostaviti sljedeću dokumentaciju najkasnije u roku od 15 dana od dana kada ga Služba obavijesti da mu je poticaj odobren:

- Kopiju obrasca prijave na Javni poziv
- ugovore o radu sa nezaposlenim osobama čije se zapošljavanje sufinansira

Ukoliko je dokumentacija potpuna i validna, zadovoljavajuća/odgovarajuća, Služba priprema tri (3) primjerka ugovora o sufinansiranju zapošljavanja i poziva poslodavca da iste potpiše. Nakon što poslodavac potpiše i ovjeri sve primjerke ugovora, Služba potpisuje i ovjerava iste, te ih dostavlja Ministarstvu. Ukoliko su svi uslovi ispunjeni, Ministarstvo potpisuje i ovjerava sve primjerke ugovora, te zadržava jedan (1) primjerak, a ostale vraća Službi. Služba zadržava jedan (1) primjerak ugovora, a jedan (1) prosljeđuje poslodavcu.

## **9. Pravdanje i isplata ugovorenih sredstava**

Po potpisivanju Ugovora, Služba mjesečno isplaćuje/refundira na račun poslodavca, sredstva za prethodni mjesec, a po izvršenim provjerama u bazi Porezne uprave.

Poslodavac se obavezuje da će, sve do isteka ugovornog odnosa, mjesečno, u pravilu do kraja mjeseca za prethodni mjesec, putem e-maila obavještavati Službu o uplaćenim doprinosima za zaposlenike.

Obavijest mora sadržavati sljedeće podatke: naziv poslodavca, JIB poslodavca, te naziv programa po kojem je zaključen ugovor o sufinansiranju zapošljavanja, kao i ime i prezime i datum rođenja sufinansirane osobe. Poslodavac se obavezuje da će, u slučaju potrebe, a po zahtjevu Službe, dostaviti Službi specifikacije, platne liste i dokaze o uplati plate i doprinosa.

## **10. Opće odredbe**

U pogledu zaključivanja, trajanja i raskida ugovora o radu i drugih situacija analogno se primjenjuju sljedeća pravila:

- poslodavac može zaključiti ugovor o radu i izvršiti prijavu osobe na obavezna osiguranja (obrazac JS 3100) na dan apliciranja na Javni poziv, s tim što će se ugovor o sufinansiranju zapošljavanja zaključiti samo sa poslodavcima koji ispunjavaju uslove Programa, u okviru raspoloživih sredstava.
- u slučaju raskida ugovora o radu sa sufinansiranom osobom, poslodavac nema pravo na zamjensku osobu budući da se radi o pripravnničkom stažu koji je tačno preciziran vremenskim okvirom. U slučaju raskida ugovora o radu sa sufinansiranom osobom, poslodavac je dužan o istom odmah obavijestiti Službu. Služba će obračunati i refundirati do tada opravdani iznos sredstava za osobu s kojom je raskinut ugovor o radu. Za eventualno ostale sufinansirane osobe koje nastavljaju svoj radni odnos kod poslodavca, nastavit će se postupanje u skladu sa zaključenim ugovorom o sufinansiranju.
- u slučaju nastupanja okolnosti da je osoba čije se zapošljavanje sufinansira, privremeno spriječena za rad duže od 42 dana ili koristi porodijsko odsustvo, o čemu Služba informiše Ministarstvo, sufinansiranje zapošljavanja se obustavlja za taj period. U slučaju povratka na rad osobe po prestanku predmetnih okolnosti, poslodavca za preostali period ima pravo nastaviti koristiti prava određena Programom i ugovorom o sufinansiranju zapošljavanja. Služba je u obavezi evidentirati navedene slučajeve te o istom blagovremeno obavijestiti Ministarstvo
- u slučaju umanjenja finansijske vrijednosti ugovora, radi efikasnosti i ekonomičnosti realizacije Programa, poslodavac je obavezan e-mailom obavijestiti Službu o nastalim promjenama što ugovorne strane prihvataju bez posebnih aneksa ugovoru.
- statusne promjene poslodavca tokom realizacije ugovora o sufinansiranju zapošljavanja (djelatnost, JIB, organizacijski oblik) nisu dozvoljene, te u slučaju istih Služba raskida ugovor o sufinansiranju zapošljavanja.
- svi korisnici Programa pristaju da Služba obrađuje njihove lične podatke u svrhu provođenja Programa, te da se njihovi podaci mogu objaviti na web stranici Službe, u svrhu informisanja javnosti o prijavama na javni poziv, te radi transparentnosti provođenja Programa.

## **11. Kontrola i praćenje izvršenja ugovorenih obaveza**

Služba će kontinuirano pratiti realizaciju Ugovora, i to:

- provjerom dokumentacije/obavijesti koju poslodavac dostavlja, radi pravdanja odobrenih sredstava

- provjerom podataka na portalu Porezne uprave FBiH
- prema potrebi i kontrolom provođenja ugovorenih obaveza neposredno kod poslodavca.

Ukoliko se praćenjem realizacije ugovorenih obaveza utvrdi da ih poslodavac ne ispunjava, Služba će pokrenuti postupak raskidanja ugovora.

## **12. Izvještavanje Ministarstva o provedbi Programa**

Služba je obavezna Ministarstvu polugodišnje dostavljati izvještaj o utrošku sredstava, a radi praćenja realizacije Programa. Po okončanju Programa, Služba će Ministarstvu dostaviti konačni izvještaj o realizaciji Programa sa efektima istog uz dokaze o isplati sredstava poslodavcima.

Ministarstvo za rad,  
socijalnu politiku i izbjeglice  
Zeničko-dobojskog kantona

**MINISTAR**  
Antonio Šimunović

JU Služba za zapošljavanje  
Zeničko-dobojskog kantona

**DIREKTOR**  
Miroslav Ilić

---

Broj:  
Datum:

---

Broj:  
Datum: